

Ballade von de Dahengt'n

Text: Tom Lackner.

Nach der Gehenkten-Ballade von François Villon (1431 - 1463)

1. Ia Mensch'nskinda, wos noch uns no lebt's
 Sat's uns ned happ, vaschliaßt's ned eicha Heaz
 wöe des Aboaman, wos ia uns jetz' gebt's
 Is eicha Lohn, foat's amoi himmewäats
 Schaut's hea, und locht's ned üba unsa'n Schmeaz
 Des is 's, wos mid so oame Trepf passiat
 Mid eanan jungan Fleisch, des jetz'n koid
 Mua'ng scho zu Schtaub und Osch'n z'foit
 A Trauag'schbüh, wos aus so Bücha wiad
 Bet's doch a weng zum liab'm God
 Dass a r Aboaman mid uns hod

2. Zwoa hod es Recht noch unsa'n Leb'm g'schrian
 Doch sat's auf Rache hoid ned so vases's'n
 De Weisheit hod – des miassat's doch kapia'n –
 Ned g'rod a jeda mid'n Leffe g'fress'n
 Dat's unsa Schuid ned goa so schdren'g bemess'n
 Schtoddess'n bitt's bei unsa'n guad'n Hea'n
 Ea mechad uns de Höll'nquoen daschboa'n
 (Obwoi mia soiche Hodalump'm woan)
 Und uns en Himme ned komplett vawean
 Bet's doch a weng zum liab'm God
 Dass a r Aboaman mid uns hod

3. Inzwisch'n hod a koida feichta Re'ng
 Uns're Kadava grauslech ramponiat
 Und duach de Sunn, de wos fia eich a Se'ng
 Is, san's schee laungsaum schwoaz wua'n und vadiat
 Dass an vom Hieschau'n schiach und schwindlich wiad
 Wos bleibt, wiad von de Krah und Ro'm zapeckt
 Mia san zarschtoch'ng, mindest'ns so guat
 Ois wia r a oida schiacha Fingahuat
 Wea unsa'n Beischbüh foigt, is boid varreckt
 Bet's doch a weng zum liab'm God
 Dass a r Aboaman mid uns hod

4. Herr Jesus, schau uns au, wia mia do hängen
 (I waaß jo eh, es is a Biss'l schbot)
 Loss doch en Luzifa uns ned darglengan
 Ia Mensch'n, quöt's und ned mid Schbottgesängen
 Schtoddess'n bet's zum liab'm God
 Dass a r Aboaman mid uns hod